



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

40. Kalenderwoche – 28. September 2008

„Wunder gibt es immer wieder...“ klingt vielen von uns der alte Gassenhauer von Katja Ebstein noch ab und an in den Ohren. Daran wird sich Eduard Sachsenmeyer wohl nach seinem Aben(d)teuer auch erinnern haben, als er seinen selbst durchlittenen wöchentlichen Satire-Nachschlag zu Papier brachte. Doch dechiffrieren Sie selbst...

E eschdes Wundor

Nee, Fahrradfahrn is werglisch immor widdor mid eim gewissn Ungemach verbundn. Vorsche Woche bin isch zum Beischbiel midm Fahrrad zum "Frischborn" gefahrn, weilsch misch dord mid meim Gumbel off e Bierschn vorabreded hadde. Also, guhd eene Schdunde binsch geradld - das ledzde Schdigd dann dursch dähn Grimmidschauor Wald. Dord in dor Gadschdädde "Frischborn", habbsch villeischd zwee Schdindschn mid meim Gumbel geglöhd. Zwee Bierschn, dazu e bißl was zu Essn... abor dann isses zum draußn Sidzn zu kiehl gewordn un mir sinn heeme. Also, mei Gumbel is zu sich nach heeme geloofen, isch hab misch off mei Fahrrad geschwung. Weils nu schon dunkl war, habbsch das Lischd angeknibbsd. Mei Fahrrad is ja ziehmlich neu, had een Dyhnamo in dor Vordorrachse drinne un die Lambe, die vorne offm Schudzblesch is, die machd mor mid eim kleen Schalldor, dähn mor nach ohm schiem muss, an. Also, Schalldor hoch - offschdeischn - e baar Medor gefahrn - Lischd gehd aus! Nochma! Schalldor hoch - offschdeischn - baar Medor fahrn - Lischd gehd aus! Das Dheador ging eene ganze Weile. Aus dor Gardnlanche warsch schon lange draußn. Un im Grimmidschauor Wald wars schdoggdusdor. Irschendwann binsch endlich dahinnorgekomm, warum dähr Schalldor immor widdor ausschaldn dud - die Dasche, die isch am Lenkor dran hab, had dähn Schalldor immor widdor nach undn geschohm, wenn isch offm Rad gesessen hab. Weil da de Federung von dor Vordorraggabel ehm gefedord had. Offschdeischn - Federung -

Lischd aus! Da mussde abor erschdema droff komm. Midn in dor Dunkelheid! Da habbsch dann die Lenkordasche abgemachd un offn Gebäggsdräschor geglemmd. Middlorweile haddsch abor vor laudor Ärschor mid dähm Lischd dähn Weesch iborsähn, in dähn isch hädde abbieschn missn. Da habbsch misch in dähm bißl Wald dährardisch vorfranzd, dass isch absolud de Orjendierung vorlorn hab. Wosch widdorma umwendn wollde - middn in dor absoludn Dunkelheid! - habbsch beim Abschdeischn midm Been die Dasche vom Gebäggsdräschor runnorgerubbd. Die is in dähn Wald geflochn. An alles schdoggdunkl! Das Lischd am Rad dud ja bloß brenn, wensde fährt. Guhd, die große Dasche habbsch dann drozdähm gefund, abor das Hendy, was in dor Seidndasche von dähr Dasche gewähsn is, das war weg. Isch bin eene Weile rumgekrochn - in dor Dunkelheid... - ja, denksde, es had ma eenor angerufn! Da häddsch das Ding ja in dor Dunkelheid ordn kenn! Nee, wenn ma eenor anrufn soll, rufd keenor an! Dodahl endnervd bin isch dann los - ohne Hendy -, um wenschen mei nagges Lähm zu reddn. Irschendwo mussde dähr bleede Wald doch een Ausgang hamm. Un dann haddsch gefundn. Un bin heeme. Fix und alle! Am näschsdn Morschn um Siehme binsch widdor in dähn Wald geradld. Nu wars ja helle. Un isch habb das Hendy gefundn! Ooch ohne, dass eenor angerufn had. Es laach da ganz unschuldisch middm offn Weesch. Dass isch dähn Weesch gefundn hab, obwohl isch ja gahr nisch wussde, wo isch iborall rumgeschderzd war, in dor Nachd... - das is e Wundor! E eschdes Wundor!

Eduard Sachsenmeyer